



Fragment of a label or stamp, partially torn and illegible.

Fragment of handwritten text on the right edge of the page, including characters like 'c', 'p', 'd', 'l'.

Rec<sup>o</sup> 20



3.

Eine Hochzeitpredigt  
Vff dem Christlichen  
Beylager des Wolgeborenen vnd  
Edlen Herrn/Wolffgangs/Grauen vnd Herrn  
zu Barbi vnd Mülingen: Vnd der Durch-  
leuchten/Hochgeborenen Fürstin vnd Frewlein/  
Frewlein Elisabeth / Geborenen Fürstin  
zu Anhalt/ Greuin zu Ascanien/  
Frewlein zu Zerbst vnd  
Bernburg etc.

Geschehen vffm Schlos zu Bern-  
burg / Mittwoch / den 19. Julij/  
Anno Domini 1570.

Durch M. Abraham Vlrichen / von  
Granach / Pfarherrn zu Zerbst etc.



Wittenberg /  
1570.



Dem Wolgeborenen

vnd Edelen Herrn/Wolfgang/Bra-  
uen vnd Herrn zu Barbi vnd Mülingen/  
vnd seiner Gnaden Gemahlen/

Der Durchleuchten/Hochgeborenen  
Fürstin vnd Frawen/Frawen Elisabeth/Ge-  
borenen Fürstin zu Anhalt etc. Greuin  
vnd Frawen zu Barbi vnd Mülin-  
gen/Meinen Gnedigen  
Herrschafften.



Stetes Gnade/Trost vnd  
Segen/vmb des HErrn  
Christi willen/zu uorn/  
Wolgeborener Graue Gne-  
diger Herr/Auch gnedige  
Fürstin vnd Fraw/Wies-  
wol ich nicht gemeinet/das  
diese einfeltige Predigt von  
mir solte gefodert/viel we-  
niger publiciert werden/Jedoch weil es dem  
Durchleuchten/Hochgeborenen Fürsten vnd  
Herrn/Herrn Joachim Ernsten/Fürsten zu  
Anhalt etc. E. G. geliebten Schwager vnd  
Bruder/meinem G. F. vnd Herrn/also gefal-  
len thnt/habe seiner F. G. befehl ich vnterthe-  
A ij niglich

niglich gehorsamen/ vñ E. G. diese meine gerin-  
ge arbeit zu vnterthenigen Ehren in den Druck  
fertigen vnd zuschreiben sollen vnd wöllen/  
Zwar nicht/ das E. G. meiner vnterweisung  
bedürffen/ als die Mosen vnd die Propheten  
vorhin/ das ist/ Gottfürchtige vñ gelehrtere Leu-  
te vmb sich haben/ denn ich leider bin: Sondern  
weil von wegen der vorstehenden trawer E. G.  
zu iren Ehren derselben Freunde/ nicht viel ge-  
genwertig habē kundten/ Doch denen auch ab-  
wesenden/ wie wir in Gottes fürcht/ anruffung  
vnd in ehren beysamen gewesen/ möchte kundt  
gethan/ vnd also vieler herzen für E. G. zu bit-  
ten bewogen werden/ auch vnter beider seits  
Vnterthanen. Dazu denn E. G. von nöten/  
das sie ires heiligen/ öffentlichen/ angefangenen  
vnd Christlichen Ehrenstandes öffentliche vnd  
Landkundige zeugnis haben. Denn wie man  
der König vnd Fürsten rath vnd heimlichkeiten  
verschweigen sol/ also sol man Gottes werck  
herrlich preisen vnd offenbaren. Zu dem/ nach  
dem es denn auch alles (Gott lob vnd danck)  
in ehren vnd guten zugegangen/ So möchte  
auch dasselbige mit der zeit E. G. Nachkomens-  
den zu lesen ein ehr vnd freude sein.

Derwegen ich in vnterthenigkeit E. G.  
bitte/ sie wöllen inen diese meine vnterthenige/  
gerin-

geringe/ doch wolgemeinte/ vnd mir befolhene  
arbeit gnediglichen gefallen lassen.

Der fromme vnd getrewe Gott verleihe  
seine Barmherzigkeit/ das E. G. in irem ehes-  
lichen leben/ in warer furcht Gottes/ nach de-  
nen schönen Ehrenspiegeln geberden vnd leben  
mögen/ so sie in diesen eilff jaren an iren gelieb-  
ten vnd zweymal zusam vorgemahlten Brü-  
dern vnd Schwestern mit lust vnd freuden ge-  
sehen/ vnd helffe/ das beide/ E. G. das dritte  
tröstliche vnd liebliche Exempel geben vnd sein  
mögen/ Dazu er denn auch E. G. mit leibes  
Früchten vnd sonstigen segenen/ Auch die betrüb-  
ten jungen zween Widwer vnd Widwinnen al-  
lerseits trösten/ regieren/ vnd zu seiner zeit sich  
ober sie auch erbarmen/ vnd mit gnaden wider  
erfreuen/ Sie auch vnter dessen für sünden  
vnd anfechtungen gnediglichen behüten vnd  
bewaren. Vnd befehle hiemit dem Allmechti-  
gen von ganzem herzen ire vnd E. F. G. vnd  
G. vnd mich denselben allen samptlich vnd  
sonderlich in demütiger vnterthenigkeit. Da-  
tum Zerbst/ vff Jacobi/ Anno. 1570.

E. G.

vntertheniger Diener

im heiligen Catechismo

M. Abraham Ulrich.

A iij Hochzeit

**Hochzeitpredigt / vff**  
dem Ehlichen Beylager des Wolge-  
bornen vnd Edelen Herrn / Wolffgang / Gra-  
uen vnd Herrn zu Barbi vnd Mülingen / Vnd  
der Durchleuchten / Hochgeborenen Fürstin  
vnd Frewlein / Frewlein Elisabeth / ge-  
bornen Fürstin zu Anhalt etc.

Psal. 45.

**H**

Dre Tochter / schawwe  
drauff / vnd neige deine Oh-  
ren / vergis deines Volckes /  
vnd deines Vaters Haus-  
ses.

So wird der König lust an deiner schö-  
ne haben / denn er ist dein HERR / vnd du  
solt in anbeten.

Die Tochter Zion wird mit geschencke  
da sein / die Reichen im Volck werden für  
dir flehen.

Des Königes Tochter ist ganz herr-  
lich inwendig / Sie ist mit gülden stücken  
gekleidet.

Man führet sie in gülden Kleidern  
zum Könige / Vnd ire Gespielen die Jung-  
frauen /

frauen/die jr nachgehen/ führet man zu  
dir.

Man führet sie mit freuden vnd mit  
wonnen/ vnd gehen in des Königes pallast.

An stat deiner Väter wirstu Kinder  
kriegen/ Die wirstu zu Fürsten setzen in al-  
ler Welt.

Ich wil deines Namens gedencken/  
von Kind zu Kindes kind: Darumb wer-  
den dir dancken die Völcker immer vnd  
ewiglich.

**A**lles was Gott ordenet/ das ist  
löblich vnd herrlich/ Ja gros sind  
die werck des **DEI**/ das/wer  
jr achtet/ der findet eitel lust dar-  
an / sagt der hundert vnd eilffte  
Psalm/ Denn die Weisheit Got-  
tes spielet dermassen vff dem Erdbodem/ für den  
augen der geliebten Menschen Kinder / das/ ob  
wol Gottes wesen vn sichtbar vnd vn begreif-  
lich/ dennoch seine Allmacht/ Güte vnd Barm-  
hertzigkeit an den wercken ersehen vnd befunden  
wird/ die er teglich machet vnd erhelt/ Prover. 8.  
Rom. 1.

Vnter diesen wercken Gottes ist nicht das  
hinderst oder geringst/ sondern der erste vnd grös-  
sten eines der heilige Ehestand/ welcher ist ein  
ordentliche zusammenkunft vnd verbündtnis ei-  
nes Mansbildes vnd eines Weibes bildes/ vnd  
nicht

nicht mehrer/so nicht wider Göttliche vnd Kei-  
serliche Recht sey/also/das jr zwey ein fleisch vnd  
gebein/ das ist/vffs aller freundlichst vnd aller-  
genawest jr lebenslang vnzertrenlich verbunden  
werden / Vnd ist dieser Stand erstlichen dem  
Man zu lust vñ freuden/vnd zur allerlieblichsten  
gesellschaft/ hülff vnd ergetzung / Aber nach  
dem fall auch zur artzney von Gott verordnet/wi-  
der die bösen vnartigen flammen vnd brunst die-  
ses verderbten fleisches / Fürnemlich aber von  
dem Allmechtigen vnd allein weisen Stifter da-  
zu eingesetzt/ das die Menschen nicht/ wie die  
Bestien/zusammen lieffen/vnd durch sünd/vn-  
zucht vnd blutschanden Gottes zorn vnd straffe  
vber sich / Land vnd Leute zögen / wie denn/  
leider/von vnzucht vnd büberey wegen die Welt  
voll zorns vnd straffe Gottes ist / Sondern/vff  
das in diesem heiligen/züchtigem vnd keuschen  
Orden ordentlicher weise Menschen gezeuget/  
vnd vnser geschlecht erhalten/ vnd aus dem sel-  
bigen die drey schönen Hierarchien/das Geist-  
liche/Weltliche vnd Hausregiment zur ehre  
Gottes erbawet vnd erhalten würden.

W hat sich innerhalb zwey oder drithalb  
hundert jaren nach ausweisung der Genealo-  
gien/ Stambücher vnd alten Vorzeichnungen/ in  
die 6. oder 7. mal begeben/ das sich das Hoch-  
löbliche/ Fürstliche Haus Anhalt / mit der be-  
nachbarten löblichen Graffschafft Barbi in die-  
sen heiligen Bund miteinander Ehelichen ein-  
gelassen / vnd freundlich zusammen gehalten/  
vnd ist/ Gott lob vnd danck/ nicht erfahren / das  
einige

einige böse Ehe/grobe sünd oder ergernis vorge-  
lauffen/ das inen einer oder beiderseits nachtei-  
lich oder schimpfflich gewesen/ oder Gott zu  
sonderm zorn vnd straffe bewogen hette/ Wie  
wir denn mit vnsern augen herrliche Exempel in-  
nerhalb wenig jaren/ mit grossen vorwundern  
vnd freuden selbs gesehen/ vnd können derwe-  
gen vnser trawrigkeit vnd schmerzen auch  
noch nicht vberwinden/ so vns durch die be-  
trübte trennung/so Gott innerhalb 34. wochen/  
vnd zu zorn/hat vorkommen lassen/ begegnet ist.

Darumb denn one allen zweifel nicht allein  
die alten löblichen Vorfaren dieser beider Herr-  
schafften sich in rechtschaffener warer furcht  
vnd anruffung Gottes zusammen begeben/ Son-  
dern es ist vns auch nicht vnbeuust/ mit was  
hertzlicher anruffung/ vnd sonderer Gottes  
furcht die jenigen zusammen kamen/ so innerhalb  
dieser verlauffnen eilff jaren von dem allmechti-  
gen Gott selbst/ einander zugeföhret wurden.

Wid darumb sollen wir itzund allzumall  
in warer demut/ furcht vnd anruffung Gottes  
bey dieser seiner heiligen ordnung auch erschei-  
nen/ vnd warer furcht Gottes in vnsern höch-  
sten ehren vnd freuden nicht vergessen/ Denn in  
diesem leben alle freud flüchtig vnd vergeng-  
lich/vñ mit trawren vermischet ist/ In massen wir  
vff diesen Nochtzeitlichen Ehren sehen/ das  
Nochtzeit Kleider vnd Trawerhüte einander be-  
geggen/vnd durch einander vormischet sein/vnd  
mit vnsern freuden noch nirgend fort wil/ wie  
B sich

sich doch zu ehren gegen diesem Stand vnd ordnung Gottes wol gebüret.

**D**Jeweil aber dieser ordnung Gottes größer reuerentz vnd ehr nicht kan widerfaren / denn wenn man des Stiffers vnd seines heiligen Wortes dabey gedencet / vnd also für allen dingen in selbst zur Nochtzeit bittet / vff das er selbst gegenwertig den Segen spreche / wie er Exod. 20. verheisset / Wo ich ein gedechtnis meines Namens stiffen werde / da wil ich gegenwertig sein vnd segenen: Darumb wollen wir hören / was Gott in seinem Göttlichen worte von diesem Stande gutes predige / vnd erfordere.

**W**ird von diesem Stand bald in allen Büchern / des alten vnd newen Testaments / viel geredt. Dem alten Mose dictieret Gott das Decretum selbs aus seinem Göttlichen Munde in die Feder / vnd heisset in also schreiben: Vnd Gott der **DE**X sprach: Es ist nicht gut / das der Mensch allein sey / Ich wil im einen gehülffen machen / der vmb in sey. Vnd sagt ferner: Es werde zwischen inen vnerfodert vnd one befehl solche liebe entstehen / die Vater vnd Mutter vergessen vnd verlassen könne / nicht aus gebot oder zwang / denn er saget nicht: Der Mensch sol oder mus Vater vnd Mutter verlassen / (quoad cohabitationis desertionem) sondern wenn sie Gott zusam führen wird / so werden sie es ex proprio motu, für sich selbst thun könnē nach Gottes ordnung. In den Propheten vnd Psalmen werden vberall viel schöner Gleichnis angezogen / welche aus der Haushaltung genommen werden / Esa. 61. Dse. 2.  
Item /

Item/in Jerem: Joel etc. Salomon hat ein son-  
der Buch de amore geschrieben/seine Cantica. Die-  
ser 45. vnd der 128. Psalm werden Brautlieder  
genennet des heiligen Geistes. Vnd vermanen  
zu diesem Stande Christus vnd die lieben Apo-  
stel mit höchstem vleis/ vff das die Ehe ja ehr-  
lich gehalten werde bey allen Menschen/ vnd  
das Ehebett vnbeslecket/ vnd zu verhütung Du-  
rerey/ ein jeder sein eigen Weib habe/ Denn die  
Durer vnd Ehebrecher wird Gott richten. Vnd  
wie dieser Psalm in der Oberschrift genennet  
wird ein besunder hohe grosse weisheit/ Maschil/  
also nennet Paulus zun Ephe: das Ehliche le-  
ben Mysterium magnum, ein besunder gros ge-  
heimnis/nemlich der bestendigen liebe vnd trew/  
so zwischen dem Herrn Christo vnd seiner  
Braut in ewigkeit sey.

Wir wollen aber aus den verlesenen wor-  
ten itzund kurtzlich sagen/ erstlichen wie es in ei-  
ner Christlichen Oeconomia oder Haushaltung  
pflege zu zu gehen/ vnd sonderlich wie sich eine  
junge Fray in irer Haushaltung vnd gegen irem  
Ehgemahl/ vnd er widerumb/ halten vnd erzei-  
gen sol.

Zum andern/ Weil der heilige Geist das  
Menschliche exempel selbst vff Christum vnd seine  
Braut/ (welcher Gliedmassen sind wir) zeucht/  
So werden wir auch alle vnsers Ampts in der  
geistlichen Haushaltung dadurch erinnert/  
das ist/ wie wir vns in der Kirchen vnd gegen  
Christo halten sollen,

B ij Zum

358  
Zu dem dritten setzt er eine schöne verheissung  
ge / so zu allen gehöret / die sich in dieser Auss-  
haltung ehrlich vnd wol halten / vnd spricht:  
Der König wird lust an deiner schöne haben.

### Das erste Teil.

**B**uorn / in dem ersten Teil dieses Psalms /  
hat der heilige Geist vber die massen den  
Brentigam / vnsern Herrn vnd Heilandt  
Christum / herrlich beschrieben / Als das er nicht  
allein ein prechtiger König / sondern auch ein  
freidiger Heldt vnd Kriegsman sey / vnuerzagt  
vnd sieghafftig wider seine Feinde / der sein  
Schwert an die seiten gürtet / sich mit freuden /  
lust vnd begird auff seinen Gaul schwinget / mit  
Pfeil vnd Bogen gerüstet / vnter seinen Feinden  
grossen schaden thue etc. Vnd sey doch der schön-  
este / allerlieblichste Man / welchem gnad vnd  
holdseligkeit aus den augen vnd lippen scheine /  
vnd der alle seine Kriege führe / allein der warheit  
zu gut / vnd die elende gerechtigkeit vff Erden zu  
schützen vnd zu handhaben. Wie denn dis fals  
alle Ehrliebende Kriegslent vnd Helden / sollen  
vnsern lieben Herrn vnd Heilandes Ihesu  
Christi lebendige Bilder vnd Contrafacturen  
sein / vnd beides / Manheit vnd sanfftmütigkeit  
leuchten / vnd gericht vnd gerechtigkeit walten  
lassen vff Erden.

Nicht allein aber ist der Herr Christus  
ein hertzenhaffter vnd sieghaffter Heldt / Son-  
dern weil man eben darumb kriegen sol / vff das  
man

man endlich in ruge vnd friede müge Gott erken-  
nen/ vnd jm in allerley Stenden dienen. Derwe-  
gen bildet der heilig Geist nach volendetem Krie-  
ge vnd erlangter victoria vnsern Herrn Chri-  
stum fur / auch vff einem köninglichen Stuel si-  
tzenden zum gericht/ in grossen pracht. Auch be-  
schreibet er herrlich ein grosses Nochtzeitliches  
geprenge/ so er mit seiner geliebten Braut vorn-  
met/ Denn auch in dieser Welt vnterweilen gros-  
se Krieg mit Weiraten beschlosssen werden/ Dar-  
umb nach dem allhie die Braut dem Könige  
herrlichen vnd Ehelichen beygesetzt / tritt Gott  
der Vater selbst herfür / thut die Glückwünsch-  
unge/ spricht den Segen/ vnd thut seiner neuen  
Schnur oder Sons Tochter eine feine/ alte/ wol  
bedechtige Vermanunge/ wie sie sich halten sol/  
damit forthin ein gute Ehe zwischen jnen beiden  
sein vnd bleiben möge / Vnd spricht also.

### Höre Tochter.

**W**Ir haben aber gehört/ das Gott der heilige  
Geist dis gantze Bildwerck aus einem feinen  
Christlichen Ehlichem leben vnd haushaltun-  
ge anzenget / In welchem von einer tugentsä-  
men Jungen Frayen oder Braut erstlichen er-  
fodert wird / das sie dem Man nicht predige/  
sondern wie im alten Testament der Erstgeborene  
Man König vnd Priester: also im Ehestand der  
Man König vnd Prediger sein / vnd das Weib  
zuhören sol. Denn die Schrift sagt/ das der  
Man des Weibes Haupt sey/ wie Christus das  
Heubt ist der Gemein / Der Mund aber stehet

B iij im

im Denbt / Darumb gebürt predigen auch dem  
Denbt: Dende / Füße / vnd andere Gliedmassen  
predigen nicht / sondern lassen dem Munde vnd  
Denpt zu / das es dem gantzen Leibe vnd allen  
Gliedmassen predige.

SO aber das Weib vernünfftig hören / so  
mus der Man auch vernünfftig reden / Denn  
wenn man nerrisch ding vor redet / so höret man  
nerrisch ding nach / vnd kompt denn also toll  
vnd töricht zusammen / so wird nimmer mehr  
nichts kluges draus. Darumb sagt Petrus: Ir  
Männer / wonet bey ewren Weibern mit ver-  
nunft / 1. Pet. 3. Denn es stehet zumal vbel /  
wenn der Man ein Narr / vnd Abigail vernünfft-  
tiger vnd klüger ist denn Nabal / Darumb wird  
das Weib für allen dingen dem Man commen-  
dieret vnd befohlen / das sie von im erstlichen  
Gottes furcht vnd Weisheit schepffen / vnd für  
iren Doctorem vnd Lerer in ehren sol. Auch wird  
eben hiemit dem Man weisheit vnd vernünfftige  
Gottes furcht vnd bescheidenheit eingebunden /  
vnd von im erfodert.

VM andern sagt er: Schawē drauff /  
das ist / es sol ein Weib nicht allein mit schultheis  
ohren hören / vnd darnach sich nider setzen / wie  
ein Ohlgötzin / die Dende in die schos legen vnd  
nichts thun / sondern in irem eigen Hause vleissig  
drauff schawē / alle ire Kindlein / Frawenzimmer /  
Megde vnd Gesinde mit heilsamen worten / gu-  
ten Exempeln vñ vleissigem auffschawen / in ge-  
bürlicher furcht zu iren diensten anhalten / in al-  
len

len wüncckeln ires befolhenē Hauses visitiern / vnd  
zusehen / das nicht irgend etwas fürfalle oder ent-  
stehe / das den Man zu zorn vnd zu vnlust bewege /  
Denn auch der Man versihet sich dessen zu ir al-  
lein / vñ zu keiner andern / Sie allein sol ires Man-  
nes getrewe gehülffin sein / vnd den Man dieser  
sorge vberheben / damit er deste vleissiger vnd  
vngehendert darauff dencken möge / wie sie mit  
Gott vnd ehren ire narung fortsetzen / von irer  
Dende werck / das ist / von den wercken ires bez-  
ruffes / essen vnd sich erhalten mügen. Dieses  
auffschawen / das ist / feine vernünfftige / heus-  
liche vorsichtigkeit wird dem Weib hiemit zum  
andern eingebunden / in massen von dem Manne  
auch erfodert wird / seiner Gehülffin mit ehren  
ins Haus zu verschaffen / darauff sie schawen /  
vnd was sie zu rath halten vnd verwaren sol.

3<sup>o</sup> Im dritten sagt er: Vnd neige deine Oh-  
ren. Denn / wenn sich eine fromme / Gottfürch-  
tige vñ heusliche Gemahl vmb das jenige / was  
in irem Hause ir zu verwaren vnd zu beschawen  
befolhen / vleissig annimet / so wird sie befin-  
den / das in keines Weibes geschicklichkeit vnd  
vermögen sey / ire Hausforgen glücklich an zu  
führen / vnd auch sagen müssen mit dem Prophe-  
ten Jerem. 10. Scio Domine, **N**ACH ich weis /  
das des Menschen thun stehet nicht in seiner ge-  
walt / vnd stehet in niemandes macht / wie er  
wandle / vnd seinen gang richte. Denn eben dar-  
umb / das das Weib / vnd nicht der Man / vr-  
sprüncklichen gesündiget vnd verführet war / wie  
der

der Apostel sagt 1. Timoth. 2. vnd also auch in  
grössere straffen vieler schwachheiten vnd vnuer-  
stands gefallen: hat es Gott aus barmhertzigkeit  
wol gefallen / das dem schwachesten vnd vnuer-  
ständigsten durch diese ordnung ein getreuer  
Vormundt gesatzet würde / bey welchem sie sich /  
als eine Miterbin / der gnaden vnd des lebens vn-  
terrchtung vnd raths / auch in der Haushal-  
tung / zu erholen / vnd also eines dem andern  
handreichung thet / vnd des einen mangel vn ge-  
brechen in gemeiner haushaltung mit trost / rath  
vnd hülff des andern ergetzt vn ergentzet würde /  
wie wir den sehē / was für ein blöder vnd schwa-  
cher Werckzeuch es ist vmb ein Weib / das / wenn  
sie schon betaget vnd alt wird / sie dennoch ire  
kriegerische Vormundt / nach gemeinen Rechten /  
haben mus / vnd sich selbst nicht regieren / ra-  
then oder helffen kan / Darumb auch der Herr  
Christus am Creutz / seine Mutter einem kriegi-  
schen Vormundt / Johanni seinem liebsten Jün-  
ger befehlet. Derwegen sollen in betrachtung  
solches natürlichen vnuerstands / schwachheit  
vnd gebrechen / auch vernünfftige Matronen  
sich desto weniger auffwerffen vnd maulen / son-  
dern ire Ohren neigen / gutem rath folgen / vnd  
ire Menner / die von Gott inen zu Vormündern  
vnd Hausrethen / ja Hausgöttern verordnet /  
in vberlegenen sachen gedültig hören / das eines  
dem andern helffe / vnd nicht vngleich in der  
heuslichen sorge / mühe vnd arbeit gezogen wer-  
de / Denn wenn einer ein vnwendiges / stoltz /  
frech / hoffertig / nachlessig Weib hat / vnd alle  
sora

sorge vff dem Man allein ligen sol/ so ist's eben/  
als ein vngleich par Ochssen / sagt Syrach 2 6.  
die neben einander vntrewlich ziehen/ vnd deren  
eines des andern todt sein mus vor der zeit.

Vnd haben sich warlich die Menner allhie  
auch zu bedencken/weil sie sollen Rath vnd Vor-  
mund sein/ das sie zusehen/vnd iren befolhenen  
Mündlein mit gutem rath vnd weisheit ver-  
nünfftig beywonen / Denn was kan nerrischer  
fürfallen / denn wenn sich die Vormunden ire  
Mündlein regieren müssen lassen?

Zum vierdten sagt Gott der Vater zu seiner  
lieben Schnure oder Tochter: Vergiss deines  
Volcks vnd deines Vaters Haus. Mit welchen  
worten er erstlichen erinnert/ das/ ob sie schon  
sich demütigen/ vnd den Man für jr Deubt vnd  
Derrn erkennen vnd fürchten müsse / So sol sie  
doch nichts deste weniger auch in solcher gedult  
vnd demut in von gantzem hertzen lieben vnd  
ehren/ vber alle Freundschaft vnd geselschaft/  
so sie auff dem gantzen Erdboden gehabt/ Also/  
das auch Vater vnd Mutter/ Bruder vnd  
Schwester/ Land vnd Lent/ vnd alles/ was vor  
geliebet ist/ vnd hat/ sol dieser liebe weichen/ vnd  
geringer sein/ Denn zu der andern keinem wird ge-  
sagt: Vnd es werden jr zwey ein fleisch sein/ also/  
das nu forthin alle ehre vnd schand/ erhöhung  
vnd ernidrigung/ gewin vnd verlust/ habe vnd  
Gut/ jr lebenlang gemein/ eines wol fart des an-  
dern freude/ eines trawren des andern hertzen-  
C leid

leid sein sol / welches auch wol zwischen Eltern  
vnd Kindern / Brüdern / Schwestern vnd den  
besten Freunden vff Erden feilen kan. In sum-  
ma / name / ehre / hab / leib vnd gut wird alles ge-  
mein / vnd nicht allein gemein / sondern grössere  
liebe vnd freundschaft wird erfoddert vnd eneste-  
het zu gleich / denn wir auch gegen denen haben /  
von welcher fleisch vnd blut wir kómen sind.

Darnach wird einer Gottfürchtigen Braut  
vnd Breutigam hiemit auch eingebunden trewe  
Keuscheit / also / das einer oder eine sich hertzlich /  
williglich vnd gerne eines gantzen Walds verzei-  
he vmb eines einigen Bawms willen / den Gott  
zeigt vnd austieset / Vnd das an alle fernere vmb-  
schweifende liebe / lust vnd gedanken / Auch dei-  
ne allerliebste Freund vnd Freundinen / vnd was  
zunor vff Erden lieb vnd werd gewesen / alles ver-  
gessen sey / damit ja nicht Freund vnd Freund /  
Nachbar vnd Nachbar forthin vnd weiter / son-  
dern jr nicht mehr denn allein zwey zusamen-  
treten / in rechtschaffener bestendiger ehre / liebe  
vnd beywohnung jr gantzes leben zubringen /  
Gott gebe wie schön / reich / fromm / verwandt  
vnd ansehenlich die andern alle sein mügen.

Also lesen wir von der löblichen vnd tu-  
gentsamen Fürstin vnd Gemahel des grosmech-  
tigen Fürsten Mercuris / da derselbige seiner herr-  
lichen thatten halb aussershalb des Königreichs  
Theba war / vnd vnter dessen der vnflat vnd Ty-  
rann

rann Lycus das Reich einnam / vnd der keuschen  
Gemahl Merculis vnehr annutet / erschricket  
sie für dieser vnuerschampten tyrannischen an-  
mutung seherr / denn sie zuuor erschrocken war /  
da die Stadmauren eingeworffen / vnd die stad  
Theba mit grausamem Sturm erobert war /  
vnd sagt ferner zum Tyrannen / Er möge wol  
wissen / das sie irem lieben Hauswirt / ob er  
gleich nicht gegenwertig / ein wort zugesagt / das  
wölle sie im halten ir lebenlang / vnd kein bluts-  
tropff in irem leibe sol diesem Unflat zu willen  
sein /

Non vincet fidem vis vlla nostram. Moriar Alci-  
de tua &c.

Ja sagt sie / wirstu darüber gewalt zu vben dich  
vnterstehen / so magstu wissen / Wer sich zwin-  
gen kan lassen / der weis nicht / wie man ehrlich  
sterben sol / Cogi qui potest, nescit mori. Das hat  
eines Weiden tugentsame Gemahl gethan / viel  
mehr sollen wir Christen ob der ein mal gegebene  
Trew einern / vnd halten bis in den todt.  
Weil der Ehstand eingemeld ist der ehren vnd  
trew / in welcher Gottes Son sich mit vns in  
ewiger lieb vnd erbarmung eingelassen vnd vor-  
bunden.

Zum fünfften setzt der dreizehende Vers  
dieses Psalms noch eine schöne tugendt Gott-  
liebender heiligen Matronen / da er spricht:  
Des Königes Tochter ist ganz herrlich inwen-  
dig. Herrische Leute wissen nicht anders / denn

E ij wenn

wenn sie auswendig geschmücket / viel vmb vnd  
an haben / so sind sie schön / da doch der vbrige  
schmuck viel mehr beschemet denn beschönet /  
Darumb redet er hie von einem Isonderlichen  
herrlichen Schmuck / der weit aller Jubilierer  
vnd Goldtschmiede arbeit / Berlen / Goldt / vnd  
Edele gestein vbertrifft / Vnd auch in war-  
heit das höchste Kleinod vnd zier einer tugentfa-  
men Hausmutter ist / nemlich der inwendige  
Schmuck / welches ist ware Erkenntnis / Glaube  
vnd Furcht Gottes im hertzen / ein fein zart vnd  
gut Gewissen / vnd Hertz / das voller Keuscheit /  
zucht / erbarer lieb vnd messigkeit ist / wie den  
Schmuck S. Paulus 1. Timoth. 2. auch be-  
schreibet / Denn welches Weib mit demselbigen  
nicht geschmücket ist / die ist ein lanter Onflat in  
irem grösssten pracht / für dem Angesichte Got-  
tes .

Darumb ist beide für Gott vnd vernünfft-  
tigen Menschen dieses kein erbare Weiberzier /  
die da stehet vnd pranget in kraussen vnd paus-  
sen / in Welschen Capellen vnd Spanischen Dir-  
diolen / vnd was der nerrischen namen vnd  
schendlichen Kleidunge mehr genennet wird /  
Sondern solche geuckeley ist viel mehr ein anzei-  
gung eines leichtfertigen Geistes inwendig im  
hertzen / vnd zeigt an / wie weit / leider / Man vnd  
Weib von der alten löblichen Deudschen tu-  
gent / zucht vnd grauitet abgewichen / weil man  
fast alle jare einer jeden daher saussenden leichtfer-  
digen Dummel zu gefalien newe schimpffliche  
vnd

vnd vnerbare Muster erdencket / vnd sich zu tra-  
gen bereden leffet / Vnd stehet doch manch mal  
vnsern Deudschen Frayen vnd Jungfrayen  
eben so hurtig / als wenn man ein Kamel solt  
tantzen leren / Derwegen wenn es grosser anse-  
henlicher Herrn Gemahl selbst thun / so stehets  
so viel desto nerrischer. In summa / der schönest  
vnd herrlichst Weiber schmuck / der vff Erden  
ist / sol inwendig sein / vnd von innenwendigem  
heraus fliessen vnd leuchten.

Diesen inwendigen Schmuck nennet er  
hie Guldene Stück vnd gestickte Kleider / in de-  
nen sie für den König / der ein Hertzenkündiger  
ist / geführet wird / mit iren Gespielen. Vnd wo  
dieser Schmuck inwendig ist / da stehet das aus-  
wendige alles wol an / wenn gleich weder Gold /  
Seiden / Sammat / Kleinod noch etwas dessel-  
ben fürhanden were / Da bricht sich keines vber  
des andern vermögen mit schendlichem pracht  
herfür / Da erkennet eines das ander für seine  
höchste zier vnd schmuck / so im vff Erden wi-  
derfaren kan / Da stehet man nicht nach hohen  
dingen / Gelt vnd hoffart mit anderer Leut be-  
schwerungen / wie wir / Gott lob vnd danck / an  
diesem ort nicht geringe Exempel mit augenlust  
gesehen haben.

Also schreibet Plutarchus von dem treff-  
lichen Helden Phocione / da im Alexander Ma-  
gnus / als seinem Freunde / ein königlich Ge-  
C iij schenck

schencck schickte / in die 60000. Kronen / vnd die  
Königliche Abgesandten in Phocionis Haus  
kommen / funden sie sein Weib im Teig hauffen  
vnd kneten / in aber / das er im selbst Wasser sche-  
pfete / seine Füße zu wasschen / vnd daneben ein  
ledig Haus / vnd wenig vorrats an allen orten /  
Darumb denn auch die Legaten anhalten / er sol  
das Geschenck nicht ausschlagen / damit er sei-  
nen Standt mit ehren führen könne / Noch schi-  
cket er dem König das Gelt wider anheim / vnd  
achtet sich viel reicher / denn Alexandrum selbst /  
weil er vnd sein Weib miteinander können ge-  
dult / vnd ire tegliche notdurfft haben / vnd so ei-  
nen hauffen geldes in einer zimlichen Haushal-  
tung nicht bedürffen. Sein Gemahl aber lies  
sich genügen an einer einzelnen Magd / mit welcher  
sie zu Marckt gieng / Vnd da eines prechtigen  
reichen Junckern Weib zu ir kam / vnd zeiget ir  
grosse güldene Ketten vnd Gehencck von köstli-  
chen Steinen vnd Kleinoten / als jres Leibes ge-  
wönliche zier / Antwortet die tugentsame Welsdin /  
vnd sprach : Meum verò ornamentum est Phocion,  
Atheniensium iam vigesimùm Imperator, Das ist /  
mein höchster schmuck vnd zier ist mein hertz-  
liebster Hauswirt / welcher nu zwentzig mal vn-  
serer alten königlichen Stad Athen oberster  
Feldtherr gewesen / vnd sich allezeit rühmlich  
vnd wol gehalten hat.

Vnd aus einem solchen innerlichem schö-  
nem hertzen flussset hero alle enfferliche / gebür-  
liche

liche reuerentz/ mit ehren/ neigen/ bucken/ bies-  
gen vnd demütigen/ ein jedes nach seinem Stan-  
de vnd wurden etc.

Vn diesem innerlichen Schmuck redet  
der Apostel Petrus trefflichen schön/ 1. Pet. 3.  
vnd spricht. Der Weiber Geschmuck sol nicht  
sein/ mit Narflechten vnd Goldt umbhengen/  
oder Kleinoder anlegen / sondern der verborgene  
Mensch des hertzen/ vnuerrückt (das ist/ reines/  
rechtschaffenen glaubens) mit sanfftem vnd stil-  
lem Geist/ Das ist köstlich für Gott: Denn also  
haben sich auch vorzeiten die heiligen Weiber ge-  
schmückt/ die ire hoffnung auff Gott setzten/ vnd  
iren Männern vnterthan waren / wie die Sara  
Abraham gehorsam war / vnd hies in Herr etc.  
Welches Herr heissen freilich nicht allein in wor-  
ten/ sondern in ehrerbietung / furcht / vnd allen  
eufferlichen geberden gestanden ist.

Vnd daselbst der Apostel als bald mit  
von Männern erfodert/ das sie widerumb auch  
bey iren Weibern mit vernunfft wonen/ vnd dem  
Weibischen/ als dem schwachisten Werckzeu-  
ge/ seine ehre/ als auch Miterbinnen der gnade  
des lebens/ geben sollen/ Damit irer beider gebet  
nicht verhindert werde etc. Sondern sie in warer  
furcht Gottes alle beide gedenccken/ Christus ist  
mein vnd dein Herr / vnd den sollen wir beide  
anbeten vnd ehren/ wie hie geschrieben stehet.  
Vnd so viel in einer kurtze von dem ersten Teil.

Das

## Das ander Teil.

**W**Eil aber das ganze Ehliche leben ein  
lauter geheimnis ist der ewigen vorbünd-  
nis vnser<sup>s</sup> D<sup>E</sup>rrn Christi / vnd seiner lie-  
ben Kirchen / Derwegen auch dieses Epitha-  
lamium oder Brautliedt ein Vnterweisung genent  
wird / nemlich / das man in auslegung dieses  
Psalms alles auff Christum ziehen / vnd dauon  
die Leut rechtschaffen vnterweisen sol / damit sie  
das grosse geheimnis recht verstehen / vnd sich  
des trösten mügen. Die Braut aber vnd Ge-  
mahl vnser<sup>s</sup> lieben D<sup>E</sup>rrn Christi ist die Christ-  
liche Kirche oder Gemeinde / welcher Gliedmas-  
sen sind wir selbst allhie gegenwertige / semp-  
liche vnd sonderliche / vnd alle Mitgenossen vn-  
ser<sup>s</sup> Christlichen Glaubens in der gantzen Welt.  
Derhalben so erfoddert auch der ewige Vater  
vnser<sup>s</sup> D<sup>E</sup>rrn vnd Heilandes Ihesu Christi  
von vnser einem jeden / wie oben nach einander  
vormeldet.

**E**stlich / Das wir vnsern lieben Breut-  
gam Christum trewlich hören / wie vns densel-  
bigen der Vater befihlet: Dis ist mein geliebter  
Son / den solt jr hören. Niemand sol one vnd  
ausser dem Göttlichen wort jm selbst trewm vnd  
gedancken machen von Gottes wesen / von sei-  
nem Göttlichen willen / von dem hohen Artickel  
Göttlicher gnadenwahrheit vnd vorsehung zum  
ewigen Leben oder ewigen vordammnis / Son-  
dern wer der warheit vnd trostes wil vorsichert  
vnd

vnd gewis sein/der gehe in die Kirche/vnd suche  
warhafftige Lere in den lippen des Priesters/  
vnd höre das Gesetz des **WERN** aus seinem  
Munde/vnd neme es von im an/als von einem  
Engel des **WERN** Zebaoths/wie Malachias  
sagt/vnd versichere sich der Göttlichen verheis-  
sung durch die heiligen Sacrament / So wird  
man wahl vnd gnaden so gantz vnd gar gewis  
versichert / das man keine vrsache finden mag  
zu zweiffeln/Denn were das nicht eine tolle herri-  
sche Braut / zu welcher Eltern oder Vormün-  
den bereit redliche Werber ausgesickt / die  
Ehe beredung geschlossen / Vorlobdnis gehal-  
ten/Wahlschatz vnd Trawring gegeben vnd ge-  
nommen/vnd sie sich dennoch noch nicht bege-  
ben/vnd ehren/trew/glauben vnd freundschaft  
zu irem Vülen vorsehen wolte oder kündte?  
Vnd wie kan vnserm lieben **WERN** vnd Heiland  
Christo grössere schimpff vnd vnehre von vns  
Gliedmassen seiner Kirchen widerfahren / denn  
wenn wir vnangesehen seines Göttlichen worts/  
seiner hochwürdigen Sacrament / seines tewren  
Bluts/seines heiligen Geistes / dennoch seinen  
waren Mund vnd holdselige Lippen nicht hö-  
ren/glauben/folgen/sondern vns vntersehen im  
selbs zu predigen/in zu verlassen/oder alles böses  
von im zu argwohnen? vnd nicht viel mehr wie  
dorten / da viel von den Jüngern des **WERN**  
sich auch ergerten / hinder sich tratten / vnd  
forthin nicht mehr mit im wandelten / mit  
**S. Petro** frey heraus sagen: **Ab WERN** / wo sol-  
D len

len wir hin: du hast ja wort des ewigen Lebens/  
wir können vnd mügen dich nicht verlassen/oder  
weggehen/Johan. 6. Bleibe du nur bey vns etc.

Zum andern sollen wir vns beneben dem  
wort/so vns gepredigt wird in der Kirchen/vnd  
sunsten auch/vmbsehen/die heiligen Sacramen-  
ten Christi hoch heben/ehren/lieben/vns dazu  
trewlich vnd offft finden/Darnach Himmel/  
Erden/Sonn/Mond/Sternen/alle Gewechs/  
Metall/vnsere eigene gliedmassen anschawen/so  
werden wir vnzelige zeugnis Göttlicher gnaden  
vnd barmhertzigkeit vmb vnd an vns finden/die  
Welt vnd vnser Gliedmassen nicht angaffen/wie  
die Kelber/so wird ein jeder so viel an sich selbst  
gewar/das er mit Jacob sagen mus: Minor sum  
cunctis miserationibus tuis Domine, Ich bin zu ge-  
ring aller barmhertzigkeit vnd aller trew/die du  
Gott an deinem Knecht gethan hast/Gene. 32.  
Darumb saget der Psalm auch hie: Schau  
drauff etc.

Zum dritten/müssen wir vnser Ohren vnd  
Vornunfft demütigen lernen vnter den gehors-  
sam des Glaubens/Rom. 16. welcher allein vff  
Gottes wort stehe/gerichtet vnd geneiget sey/  
dem Wort nicht halsstarrig vns widersetzen/  
vnd das Maul dagegen vffwerffen/oder in vn-  
sern Köpffen von ersten fleischliche vernünfftige  
gedancken aus der natürlichen Philosophia schepf-  
fen/vnd nach denselbigen Gottes wort vnd die  
Sacra

Sacrament richten / vrteilen / radtbrechen vnd  
martern / wie die Widerteußer vnd Sacramen-  
tierer thun / sondern viel mehr / wie im ende des  
alten Testaments / so balde Christus kam vnd  
vfftrat / da mussten alle alte Gesetz / von schlach-  
ten / festen / Kleidungen vnd Ceremonien vffhö-  
ren / sich reformieren lassen / vnd des alten verges-  
sen werden / Also / wenn Christus ein wort redet /  
so sol alle Philosophia vnd Vornunfft das Maul  
halten / vnd sich nach dem Wort allein richten /  
vnd also / das auch nach dem mass oder Ellen ge-  
messen werdē / vnd nicht vnser Narrengedanken /  
sondern das klare helle Wort / wie dieses ist: Dis  
ist mein Leib / der für euch gegeben wird etc. vnser  
Glaubens fundament vnd Richtschnur sein .

Desgleichen sollen wir vns für Gott nicht  
in vnserm eusserlichen schmuck der gegenwertigen  
guten wercke / brüsten / derselbigen gegenwer-  
tigens scheins / würde vnd vordiensts rhümen /  
sondern vnsern schmuck inwendig / im glauben  
an Christum sein lassen / Denn Gottes Reich ste-  
het nicht in eusserlichem schmuck / geberden / Ce-  
remoniē / frömbkeit vnd tugenden / Sintemal vns  
Gott allezeit für eine eusserliche oder innerliche tu-  
gendt künde dagegen tausent vntugendte vnd sün-  
de wider sein heiliges Gesetz vffrücken vnd für  
die nase halten / wie Diob sagt / cap. 9. Sondern  
vnser ehre / rhum vnd schmuck für Gott ist allein  
vnser lieber Herr vnd Heilandt Christus mit  
seiner gnade / inwendig im hertzen / durch den

D ij glauben

Glauben ergriffen/welchen glauben er doch selbst  
in vns wircken/aus gnaden schencken vnd geben  
wil vnd mus/vnd welcher in keiner Heidnischen  
Philosophorum Physica oder Dialectica zu finden/  
sondern allein von Gott durchs Wort vnd Sa-  
crament geschaffen/erwecket vnd erhalten wird/  
Darumb den Esa. 61. sich nichts zu rühmen vnd  
zu frewen weis / denn allein in dem **DEXXI**/  
Gaudens gaudebo in Domino. Vnd wer sich rüh-  
met/der rühme sich des **DEXXI**/. 1 Cor. 1. Diere. 9.

**W**aber Christus sein Reich vnd wohn-  
ge im hertzen hat/alda/vnd zuuorn nicht/erfol-  
get stetes warhafftes/innerliches/Gottgefelliges  
auswendiges anbeten / wie hie gesagt wird:  
Er ist dein **HEX** / Vnd solt in anbeten.  
Da schaffet vnd wircket der Geist des **DEXXI**/  
in betrachtung Göttliches worts / ein neues  
Hertz/vnd in demselben einen neuen Mut/Sin-  
ne / Willen vnd Gedancken / welches heraus  
bricht in einem Gott wolgefelligem eusserlichem  
Gehorsam / auff das allein Gottes die ehre/vnd  
vnsrer schmuck nichts sey denn vnsrer lieber Pho-  
tion / das ist / Christus mit seinem Geist / ver-  
dienst/wolthaten vnd gaben / Der vns im ver-  
lobet in ewigkeit / vnd sich mit vns vertrawet in  
gerechtigkeit vnd gericht / in gnad vnd barm-  
hertzigkeit / ja im Glauben sich mit vns verlo-  
bet / das wir in allein erkennen / wie der Prophet  
sagt / **Pse. 2.**

**DAS**

Denn eben dis ist die Unterweisung / Ge-  
heimnis oder Maskil / darumb der Ehestand  
eingesetzt/wie aus der Epistel zum Ephesern oben  
vormeldet / Darumb sehen wir / das Gott auch  
fromme Eheleut / die nu kaum bey einander ge-  
wonet / vnd sich bedüncken lassen / sie künden vnd  
vormöchten on einander nicht zu leben / von ein-  
ander reisset vnd trennet / Als wolt er sagen: Mein  
liebes Kind / mein lieber Son / du hast bishero  
dich düncken lassen / du lebest von des Ehestan-  
des wegen / vnd habest darinnen deines hertzen  
lust vnd deiner augen trost gefunden / Aber dis  
alles solte dir nur ein erinnerung gewesen sein der  
hertzlichen liebe meines lieben Sons gegen dir /  
Darumb mus ich ewer eines aus des andern  
schos vnd armen reissen / Denn der Ehestand ist  
nicht das rechtschaffene Original / sondern ist  
nur ein Copey / ein Abriss / tünckel bild vnd con-  
trafactur derselben waren ewigen liebe / Vnd wie  
du deinen Herrn / meinen Son Christum wi-  
derumb ehren / lieben vnd im anhangen soltest /  
Denn das Bündtnis / so du mit im gemacht /  
das sol ewig sein vnd bleiben / Alles zeitliche  
Bildwerck ist vergenglich. Darumb sagt Sanct  
Paulus: Wer ein Weib hat / der sey als habe er  
keines / Denn die Schemata dieser Welt sind alle  
flüchtig / vnd gehen schnell nach einander dahin /  
1. Corinth. 7. Gleich wie die stimme oder wort /  
so ich itzund geredt / dahin ist / vnd nicht wider  
komet.

D iij D Erwes

**D**Erwegen sollen wir fein bey lebendigem  
leibe vnd bey guter gesundheit vnd vornunfft/ ja  
auch in vnsern höchsten Ehren vñ freuden/immer  
gemachsam vns der Welt entziehen / Vnd son-  
derlichen die jenigen/ so sich in diesen Stand be-  
geben/ solten gedenccken an die feine alte disciplin/  
vnd wie vorzeiten/ wenn schöne junge Frewlein  
vnd Jungfrawen in die Clöster genomen/ vnd/  
wie man die zeit furgab / dem D<sup>er</sup>rn Christo  
gegeben vnd geschleiert wurden / so gab man  
inen ein Crucifix in die armen / für welchem sie  
denn fein höflich vnd demütig niederfielen/ vnd  
mit sehnlicher stimme/ das denen/ so es anhör-  
ten/ die threnen vber die wangen lieffen/ von her-  
tzen/ wie es für der Welt scheint/ sungen: Regnum  
mundi & omnem ornatum seculi despexi, propter amo-  
rem Domini nostri Iesu Christi, Quem vidi, quem ama-  
ui, in quem credidi, quem dilexi, Das ist/ Ade Welt/  
mit alle deiner pracht vnd wollust/ Ich achte dei-  
ner nicht mehr/ vmb meines liebē D<sup>er</sup>rn Ihesu  
Christi willen / welchen allein ich nu fort hin-  
sehawen/ lieben/ an in glauben/ vnd in allein von  
hertzen meinen wil / Vnd darauff den anfang  
dieses Epithalamij: Eructauit, Mein Hertz tichtet  
im ein feines Lied etc.

**A**lso sollen Eheleut / so in diesen Standt  
miteinander treten / auch gedenccken: Wolan/  
fahr hin Welt / mit deinen leichtfertigen freu-  
den / Ade gute gesellschaft/ vnd was in die Welt  
zu gefahr vnd schaden gezogen hat / Ich trette  
mit

mit meinem lieben Gehülffen nu in einen Orden/  
darinnen mein Creutz vnd trübsal auch fürder  
vnd alle tage vnser lieben N<sup>o</sup>rrn Christi be-  
darff/Dem wollen wir vns befehlen/an in glen-  
ben/in von hertzen meinen / wie oben von der  
Mercuris Gemahl gesagt ist / Denn er ist vnser  
N<sup>o</sup>rr vnd Ehre/der vns aus der gewalt des al-  
ten siebentöpffichten Drachen erlöset/ für vns in  
die Wellen gefahren / vns von dem vnflat der  
sündhafftigen Welt / wie aus dem vnflatigen  
stabulo Augiaë errettet/ vnd gereiniget/vnd all vn-  
ser Feindt mit gewalt vnter sich geworffen / vnd  
ein schawspiel aus inen gemacht öffentlich. Vnd  
so viel vom andern Stücke.

### Das dritte Stück.

**I**st die schöne Verheissung: So wird der  
König lust an deiner schöne haben. Das  
ist/ Wirstu dich nach empfangener gnade  
vnd heiligem Geist deinem liebe Breutgam von  
tage zu tage mehr ergeben/in seinem erkentnis/  
furcht/ lieb vnd trewen gehorsam vben/ so wir-  
stu deinem lieben Christo sein getrewes Hertz  
gar abgewinnen vnd einnemen/alles dessen was  
du verlassen hast/wil er dich ergetzen/Sterben dir  
Eltern vnd Freund/ so sollen dir von deinen Len-  
den widerumb andere geboren werden / die du  
Fürsten vnd Königes Kinden vorziehen wirst/  
gegē welchen Gott so ein schöne hertzliche brunst  
in dein hertz ausgiessen wird/ das du für ein ar-  
mes

mes rotziges Kindlein vmb deines Gottes wil-  
len/ der dir es gegeben / nicht ein gantze Welt  
nemest / ja dein leib vnd leben / Gut vnd blut  
für es setzest / Vff das du ja dis Mysterium oder  
Geheimnis lernest verstehen / vnd glauben/ mit  
was trewen/ lieb vnd barmhertzigkeit du von  
deinem Gott angenommen vnd vmbfangen seiest.

Als dieser grossen / vnbegreiflichen liebe  
wird auch folgen/ das dich dein Brantgam (wie  
es gebrechlich) wird in die gemeinschaft vnd  
besitzung aller seiner Güter einsetzen / vnd dir die  
Schlüssel vber alles vertrauen / vnd die besten  
wörtlein / Meum & tuum, darob man so arglisti-  
ger / böser / neidischer weise kiefet vnd haddert/  
das alle Scheppenstüel / Cancellen / Kammer-  
gericht vnd Parlament voller Zancksachen sein/  
sein freundlich vffheben / das/ wenn gleich eines  
erniedeet wird / dennoch dasselbige nicht Klein-  
mütig vnd vngedültig werde / von seines Mitge-  
fellen wegen. Widerumb/ wenn auch schon eines  
erhöhet / so helt Gott die wege auch gleich inen/  
das man sich nicht vberhebe/ vnd vermessen wer-  
de / wie wir dessen liebliche / schöne Exempel an  
denen gesehen / die nu auch Gott gefallen / vnd  
zu im in ewige himlische Gemeinschaft/ aus die-  
sen Herrschafften erhoben vnd versetzt sind.

Desgleichen wird aus solcher grossen lieb  
vnd brunst dein lieber Gemahl Christus dich  
schützen/ handhaben/ regieren/ wle einem from-  
men

men Eheman zustehet / Vnd wenn gleich ge-  
brechen vnd mangel fürfallen/wenn du nur mit  
hertzen an jm allein hangest / vnd glauben hel-  
test/wird er vber deine gebrechen ein remissionem  
peccatorum sprechen/dieselben nicht sehen wöl-  
len / vmb all des andern guten willen/ so er an  
dich gewendet.

Vnd endlichen nach vollenzogenem Ehe-  
lichen Beylager wird er dich aus deines Vaters  
Haus/aus dieser betrübtten / vnrügigen / tollen  
vnd vollen Welt in seine ewige Dütten vnd him-  
lische freude vnd herrligkeit nemen/da du seines  
Namens mit deinen Kindern vnd Kindskindern  
gedencken / vnd wie der Psalm beschleusset/mit  
allerley Völckern jm immer vnd ewiglich dan-  
cken wirst/ Amen.

### Lasset vns beten.

**W**ir dancken dir Himlischer Vater von ganzem  
herzen/ das du nicht allein den heiligen Ehe-  
standt eingefahrt/vnd durch denselbigen vns Leib  
vnd Seel gegeben/darinnen erzogen/erhalten/vnd allers-  
ley gutes hast widerfaren lassen/ sondern auch darinnen  
das grosse Geheimnis zeigest/der herrlichen lieb vnd ver-  
bündnis deines lieben Sons/vnsers HErrn Ihesu  
Christi vnd seiner Kirchen/ welcher Gliedmassen wir  
sind/ deinem allerliebsten Sone vertrauet in ewiger  
barmhertzigkeit.

E Vnd

Vnd bitten dich von herken/du wollest vnser Herz-  
ken für vnd für bewegen vnd treiben/von diesem heiligen  
Geheimnis heilige vnd vernünfftige gedancken zu ha-  
ben/alle vnser leichtfertige vmbfchweiffende gedancken/  
vnd vnserer Jugendt vnd vnuerstandes sünde/ vmb deis-  
nes geliebten Sons vnfers allerliebsten HErrn vnd  
Breytgams willen/vnserzeihen vnd vergeben/vnd vns  
in sein wares erkentnis./furcht vnd liebe leiten vnd füh-  
ren.

Du wollest auch diese deine Ordnung gnedigs-  
lichen erhalten/ vnd die sich in deiner furcht darein beges-  
ben/ haben/ vnd werden / mit Leibes fruchten vnd not-  
durfft segenen/ vff das sie aus iren Lenden geborne Ans-  
ruffer deines heiligen Namens hinder sich lassen/ Vnd  
also dein erkentnis in der Welt vnter vns bleibe/ bis vns-  
ser HErr vnd Heilandt Christus kome zum Gericht.

Lass dir auch dis Hochlöbliche Fürstenthumb Ans-  
halt/ sampt der Löblichen Graffschafft Barbi in irem  
grossen betrübnis vnd beschwerungen befolhen sein/ vnd  
verleihe gnad/ das wie sie nu zum offtern mal nach deis-  
nem willen einerley Fleisch vnd Gebein worden/auch als  
le beider seits/ von Anhaltischem vnd Barbischem ges-  
blüt Kinder vnd Nachniffeln geboren sein: also sie auch  
femplich in deiner furcht vnd freundlichem guten vera-  
stande verbunden/in guter Nachbarschafft einander lies-  
ben/ ehren/fürdern/guts vertrauen für vnd für zusam-  
men tragen mügen/vnd mit der that beweisen.

Lass dir auch gegenwertigen Breytgam vnd  
Braut gnediglich vnd veterlich befolhen sein. Sünde an  
vnd

vnd erhalt in inen ware furcht/erkentnis vnd anruffung  
deines heiligen Namens. Segene sie an Seel/ Leib/  
Ehr vnd Gut/ nach deinem veterlichen wolgefallen.  
Tröste sie in allem trübsal vnd beschwerungen/vff das  
sich dis Fürstliche betrübte Haus widerumb auch irer  
furcht Gottes/ bestendiger liebe/ wolfart/segens vnd ge-  
deiens zu frewen vnd zu ergehen habe.

Hiemit wir denn auch dir/ du lieber Vater im  
Himmel/vnsern lieben Landesfürsten/sampt desselbigen  
geliebten Oleyflanken / allen Verwandten / trawrigen  
vnd leidtragenden/ auch dis ganze Fürstenthumb/sampt  
der Barbischen Graffschafft / beiderseits regierungen/  
Vnterthane vnd vns alle / in deine Gnade vnd  
Barmherzigkeit befehlen wollen / vnd fur  
einander von herzen das heilige  
Vater vnsere sprechen.

Laus Deo.

*Annus.*

ELIsabethæ VIRgInIs  
Toro MarItVs gaVDeat:



Gedruckt zu Wittenberg / Durch Jo-  
han Schwertel / 1570.

Faint, illegible text at the top of the page, possibly bleed-through from the reverse side.

Second block of faint, illegible text in the middle of the page.

Third block of faint, illegible text, possibly a signature or name.



Fourth block of faint, illegible text at the bottom of the page.



Handwritten text in a historical script, likely German, along the top edge of the page.

Nh 89  
g

ULB Halle  
004 167 198  
3



f  
Slo

nc





